

## 每週經課朗誦經文(巴克禮漢羅/教羅)2014/04/06

### 共同經課 - 1

#### 以西結書三十七章一節~十四節

1 耶和華 ê 手 hē tī 我 ê 身上，耶和華用祂 ê 神 chhoā 我出去，hē 我 tī 山谷中；hit-ê 山谷有骨頭滿滿。2 祂 hō 我 tùi 骨頭 ê 四圍經過；看 ah, tī 山谷 ê 面上有骨頭真 choē, 看 ah, in 真枯焦。3 祂對我講，人子 ah, chiah-ê 骨 oē 活 boē? 我應講，主耶和華 ah, 祢知伊。4 祂 koh 對我講，你 tiòh tùi chiah-ê 骨宣傳，來 kā in 講，Lín 枯焦 ê 骨 ah, tiòh 聽耶和華 ê 話。5 主耶和華 kā chiah-ê 骨 án-ni 講，看 ah, 我 beh hō 活氣入 lín ê 內面，lín 就 beh 活。6 我 beh hō lín ê 頂面有筋，koh hō lín 有肉，koh 用皮 kā lín 包，用活氣入 tī lín, lín 就會活；lín 就知我是耶和華。7 Tùi án-ni, 我 thàn 命令來宣傳；當我 teh 宣傳 ê 時，有聲，忽然地動，chiah-ê 骨相連合，tāk 支歸伊 ê 本位。8 我看伊，看見骨 ê 頂面有筋，也有肉，koh 有皮包 tī 伊 ê 頂面；總是內面無活氣。9 伊就對我講，你 tiòh òng 風來宣傳；人子 ah, tiòh 宣傳，來對風講，主耶和華 án-ni 講，活氣 ah, tùi hiah-ê 風來，pùn tī chiah ê 受 thài-ê, hō in 能活。10 Tùi án-ni, 我照伊所命令我 ê 來宣傳；活氣就來，人 tī in; in 就活，起來 khiā, 成做極大 ê 軍隊。11 祂就 kā 我講，人子 ah, chiah-ê 骨就是以色列 ê 全家；看 ah, in 講，阮 ê 骨 lóng 枯焦，阮 ê òng 望 lóng 失落；阮一盡剿滅。12 所以你 tiòh 宣傳，來對 in 講，主耶和華 án-ni 講，我 ê 百姓 ah, 看 ah, 我 beh 開 lín ê 墓，hō lín tùi lín ê 墓起來，chhoā lín 入以色列地。13 我 ê 百姓 ah, 我開 lín ê 墓，hō lín tùi lín ê 墓起來，lín 就知我是耶和華。14 我 beh 將我 ê 神 hē tī lín ê 內面，lín 就 beh 活；我安置 lín tī 本所在，lín 就知我耶和華 án-ni 講，也 án-ni 成；這是耶和華講 ê。

### 共同經課 - 2

#### 詩篇一百三十篇

1 上崎 á ê 詩。1) 耶和華 ah, 我 tùi 深淵求叫你，2 主 ah, 求你聽我 ê 聲；願你 à<sup>n</sup> 耳孔聽我懇求 ê 聲。3 主耶和華 ah, 你若究勘罪惡，Chī-chūi khiā-oē-tiáu? 4 總是你有赦免 ê 恩，Beh hō 人敬畏你。5 我 thèng 候耶和華，我 ê 心神 teh thèng 候；Tī 伊 ê 話我有 òng 望。6 我 ê 心神 thèng 候主，比守更 ê 人 thèng 候天光 khah 切，比守更 ê 人 thèng 候天光 khah 切。7 以色列 ah, 你 tiòh òng 望耶和華；因為 tī 耶和華有慈愛，Tī 伊有豐盛 ê 救贖。8 伊的確救贖以色列，脫離伊一切 ê 罪惡。

### 共同經課 - 3

#### 羅馬書八章六節~十一節

6 因為肉體 ê 意向是死；神 ê 意向是活 koh 平安。7 因為肉體 ê 意向是對敵上帝，因為伊無降服上帝 ê 律法，也 boē 會降服。8 Koh tiàm-tī 肉體 ê, boē 會 hō 上帝歡喜。9 獨獨上帝 ê 神若 khiā 起 tī lín, 就 lín 無 tiàm-tī 肉體，是 tiàm-tī 神；無有基督 ê 神 ê, m̄ 是伊 ê 人。10 基督若 tiàm-tī lín, 就 lín ê 身軀因為罪死，神因為義活。11 獨獨 hō 耶穌 tùi 死人中 koh 活 ê, 伊 ê 神若 khiā 起 tī lín, 就 hō 基督耶穌 tùi 死人中 koh 活 ê, 也 beh 將伊 ê 神，就是 khiā 起 tī lín ê, hō lín 會死 ê 身軀 koh 活。

### 共同經課 - 4

#### 約翰福音十一章一節~四十五節

1 有一人，名拉撒路，破病；伊 khiā tī 伯大尼，就是馬利亞 kap 伊 ê 姊妹馬大 ê 鄉社。2 Chit-ê 馬利亞就是 bat 用香油抹主，用伊 ê 頭毛拭主 ê 腳 ê, 伊 ê 兄弟拉撒路破病。3 In 兩個姊妹就差人去 chhē 耶穌，講，主 ah, 你所疼 ê 人破病 lah。4 耶穌聽見就講，Chit-ê 病不致到死，就是為 tiòh 上帝 ê 榮光，hō 上帝 ê kiá<sup>n</sup> tùi chit-ê 得 tiòh 榮光。5 Ta<sup>n</sup> 馬大，kap 伊 ê 姊妹，kap 拉撒路，lóng 是耶穌所疼 ê 人。6 既然聽見伊破病，就 tī 所 toà ê 所在猶原 toà 兩日。7 後來就 kā 學生講，咱 koh 來去猶太。8 學生 kā 伊講，拉比，近來猶太人 ài beh 用石頭 tim 你；你 iáu beh koh 去 hia mah? 9 耶穌應講，一日 kiám 無六時 mah? 人若日時行，就 boē tak-tiòh, 因為看見 chit 世間 ê 光。10 總是人若暝時行，就 tak-tiòh, 因為內中無光。11 講 soah, koh kā in 講，咱 ê 朋友拉撒路 teh 暈；我去是 beh 叫伊醒。12 學生講，主 ah, 伊若 teh 暈，就會好。13 耶穌所講是指伊死；但是 in 掠 chún 是指伊安眠 teh 暈。14 所以耶穌明明 kā in 講，拉撒路死 lah。15 我亦為 tiòh Lín 歡喜，因為我無 tī hia, 是 beh hō lín 信；總是咱來去就近伊。16 多馬，chengTe2-thó-má ê, 就 kā 同做學生 ê 人講，咱 chiah-ê 亦來去，kap 伊相同死。17 耶穌到 ê 時，拉撒路 tī 墓裡已經四日 lah。18 伯大尼近耶路撒冷，相離約量五里；19 有猶太 choē-choē 人已經就近馬大馬利亞，beh 為 tiòh in ê 兄弟來安慰 in。20 馬大聽見耶穌來，就去接伊；馬利亞猶原坐 tī 厝內。21 馬大 tùi 耶穌講，主 ah, 你若 tī chia, 我 ê 兄弟就 boē 死。22 我 ta<sup>n</sup> 亦知見若你 tùi 上帝求 ê, 上帝 beh hō 你。23 耶穌 kā 伊講，你 ê 兄弟 beh koh 活。24 馬大 kā 伊講，我知 boát-jīt, koh 活 ê 時，伊 beh koh 活。25 耶穌 kā 伊講，koh 活 kap 活命是在 tī 我；信我 ê 人 sui-bóng 死，iáu-kú beh 活；26 見若活來信我 ê 人永永 boē 死。你信 chit-ê mah? 27 伊 kā 伊講，主 ah, 是 lah, 我已經信你是基督，上帝 ê Kiá<sup>n</sup>, 就是來入世間 ê。28 講 soah, 就 tò 去，暗靜叫伊 ê 姊妹馬利亞，講，先生來 lah, teh 叫你。29 馬利亞聽見，緊緊起來，去就近伊。30 Hit-tiáp 耶穌 iáu-bē 入鄉社，iáu tī 馬大接伊 ê 所在。31 Hiah-ê kap 馬利亞 tī 厝內 teh 安慰伊 ê 猶太人，看見伊緊緊起來出去，就 tè 伊，phah 算伊 beh 去墓裡啼哭。32 馬利亞到耶穌所 tī-teh ê 所在，看見伊，就仆伊 ê 腳下，kā 伊講，主 ah, 你若 tī chia, 我 ê 兄弟就 boē 死。33 耶穌看見伊啼哭，koh kap 伊 sa<sup>n</sup>-kap 來 ê 猶太人亦啼哭，就真感心，koh 大 jū 亂，34 講，Lín hē 伊 tī 甚麼所在？In 就 kā 伊講，主 ah, 來去看。35 耶穌流目屎。36 猶太人就講，你看，伊疼 chit 人到 án-ni! 37 其中有 ê 講，伊 bat 開 chhi<sup>n</sup>-m̄ 人 ê 目矚，kiám boē hō chit 人無死 mah? 38 耶穌 koh 感心到墓裡。Hit-ê 墓是石洞，有一塊石塞 hē-teh。39 耶穌講，徙開 hit 塊石。死人 ê 姊妹馬大 kā 伊講，主 ah, ta<sup>n</sup> 臭 lah；已經死四日 lah。40 耶穌 kā 伊講，我 kiám 無 kā 你講，你若信，能看見上帝 ê 榮光 mah? 41 In 就徙開 hit 塊石。耶穌 kiáh 目 òng 天，講，父 ah, 我感謝你，因為你已經聽我。42 我知你常常聽我；獨獨我講 án-ni, 是為 tiòh 周圍 teh khiā ê 眾人，hō in 信你差我。43 講 soah, 就大聲喉叫，講，拉撒路，出來。44 死人就出來，手腳紮布，面包巾。耶穌 kā in 講，tháu 開，hō 伊行。45 就近馬利亞 ê 猶太人，看見耶穌所行 ê tai-chi ê, choē-choē 信伊。